

Ken a sali beneficiá di esey

Excavacion di oro na Aruba ta keda un misterio grandi

ORANJESTAD - Pueblo di Aruba por corda ainda cu un aña y mei pasá e companía Canarub Gold Development, un companía specializá den buscamento di oro, hunto cu CASMYN USA, Inc., specializá den loke ta trata Medio Ambiente y tambe proceso di

mineral, a haci peticion na gobierno pa nan establecé nan mes aki na Aruba cu e propósito pa haci un estudio y excavá pa mira si por encontrá oro den e subsuelo.

Ora cu nan a haya luz berde for di gobierno, a cuminsá trabaonan di ex-

cavacion pa saca muestranan pa estudio. Despues di un par di luna, a lanta bela bai cu tur loke nan por a saca for di nos suelo y sin duna cuenta di nada.

E companía CANARUB cu equiponan hopi moderno a cuminsá cu e trabaonan di

cobamento na diferente partinan riba nos isla cu pa historia ta conocí como lugarnan unda na hopi ocasion e mineral precioso aki ta wordo señalá.

E tempo ey e companía a saca masha hopi muestra mes pa estudio, cu despues den nan propio laboratorio, lo wordo inspeccioná.

Loke ta resta for di e inspeccion ta wordo almacená y transportá pa Canada pa un estudio mas avanzá.

Pa sorpresa di hopi hende, direpente e companía a haya ta bon pa sera su portanan, bende tur nan equiponan y bai for di Aruba.

Tin informenan cu ta muestra cu e companía logra saca bastante oro den e muestranan di laboratorio pero cu nunca a pone gobierno na altura di e situacion. Awe, un aña y mei despues ainda no tin un splicacion con por ta posibel cu gobierno a permití e hendenan aki establecé nan mes akinan, sin un dia tabatin control riba loke nan tabata haciendo.

Bon Dia Aruba a dicidí di sigui busca informacion riba e caso aki pa saca afó kiko en realidad e companíanan a haci durante nan

permanencia aki na Aruba.

A tuma contacto cu e vocero di asuntonan económico p'asina haya mas informacion riba henter e asunto ey. El a bisa cu enberdad e companía a haya permiso di gobierno pa establecé nan mes akinan pero e no ta na altura si nan a saca oro y bai cuné for di Aruba sin duna cuenta na gobierno.

El a bisa cu ta berdad si cu gobierno a duna nan man liber pa haci y deshacé pa despues baha na awa.

Bon Dia Aruba e ora a dicidí di tuma contacto cu departamento di asuntonan hurídico tocante e caso aki pero lamentablemente no por a haya mas informacion.

E situacion aki sigur mester di un investigacion profundo di parti di gobierno pa mira cu ki propósito e hendenan aki a establecé nan mes aki na Aruba y kiko a wordo sacá. Pasobra si en realidad e hendenan aki a haya oro, nan mester a avisá gobierno inmediatamente pero no tabata e caso.

Pesey lo ta bon pa gobierno no laga e asunto aki drumi pasobra no por permití pa ningun hende bin haci of deshacé na nan antoho di nos riquezanan. □

Bon Dia Aruba . - (15 oktober 1993)